



Comune de Terranoa

“INTRECCI”

**Su 13 de su mese de Frearzu s’aberit una mustra dae
su nùmene “Intrecci” in su Refetòriu de s’Arte**

Publicadu su 11 de su mese de frearzu de su 2023

Lunis 13 de su mese de frearzu torrat a abèrrere su Refetòriu de s’Arte, in su vìculu de sa Refetzione, gràtzias a sa mustra colletiva “Intrecci”. Pro chimbe dies sos bisitadores podent abbaidare sas òperas de ses artistas locales e podent fàghere donatziones a su Tzentru de Salute Mentale (CSM) de Terranoa amministradu dae sa dutora Luisa Budroni. S’obietivu de su progetu est cussu de àere su materiale pro fàghere unu murale in custa istrutura, chi est in carrera Baronia.

Sa mustra aberit lunis a sas chimbe de sero (17.00). Sas òperas de B, Luca Secchi, Mozok, Lisa Fancello, Manuela Carboni e Andrea Agostino Dalias ant a abarrare in cue finas a chenàbura 17 de su mese de frearzu, dae sas deghe e mesa de manzanu (10.30) a sa una de mesudie (13.00) e dae sas batoro de sero (16.00) finas a sas sete de sero (19.00).

S’organizatzione est fata dae s’assòtziu de promotzione sotziale Omnia, e dae sa Asl Gaddura, chi dae medas annos faghet atividade de inclusione e integratzione sotziale. Su Comune de Terranoa dat su permissu de comintzare s’iniziativa.

«Est unu progetu chi cheret interessare istitutziones diferentes e figuras professionali, pro ite in su cuntestu de sa salute mentale sa collaboratzione est de importu mannu pro arribare a custos obietivos», narat sa dutora Emanuela Angioni, responsàbile de su Tzentru Diurnu Riabilitativu Psichiàtricu de su CSM de Terranoa. «In custu casu su progetu at una funtzione dòpia: cun s’espositzione de sas òperas de arte si cheret fàghere àtera arte. Sos fundos àpidos ant a serbire, difatis, pro comporare su materiale de disignu de su murale, dende valore a unu logu cumpartzidu e permitende momentos pro fàghere sotzializare sos chi intrant in custu logu, dende a custos sa possibilitade de si cumparare, fàghere atidades manuales, mustrende capatzidade de progetare, pianificare e coperare. Custu protzessu – narat sa dutora Angioni – faghet nàschere unu benefitziu pro sa salute mentale de sos patzientes, ca faghet isvilupare sa capatzidade espressiva, dat valore a sa cumpetèntzia issoro, isvilupat abidades diferentes e s’àuto istima. Naro gràtzias a su Comune, a s’assòtziu Omnia, a sa biblioteca comunale, a sos artistas e a sas educadoras professionali

de su Tzentru Diurnu, sas dutoras Sara Bernardini e Sonia Sanna chi ant traballadu meda pro fàghere custu progetu. Isperamus chi sas òperas piagant a zente meda, pro dare su mèritu a sos artistas e àere sos fundos chi serbint».

«S’arte est una manera pro nos esprimere, una limba chi nos aunit, una fonte de ispirazione pro s’artista e pro cussos chi l’abbàidant – at naradu s’assessora a sa cultura Sabrina Serra -. Pro custu, una mostra de arte est semper un’esperientzia emotiva e in custu casu finas de prus. Nois sustenimus custa iniziativa pro ite creimus de a beru chi est de importu mannu, e at unu valore sotziale e culturale».



**Tradutzione a cura de s’Isportellu de Limba Sarda – Progetu
“Tarranóa e Terranoa ” – annualidade 2022 – Finantziadu dae sa
RAS cun sa L.482/99 e cun sa L.R. 22/2018**